

Inuussutissarsiutigalugu aalisartunut piniartunullu inuussutissarsiutigalugu umiatsiaararsinissamat tapiiffigitittalernissaat siunertaralugu, Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisaata allannguutissaanik Naalakkersuisut siunnersuuteqarnissaannut peqquneqarnissaat Inatsisartut aalajangiiffigisassaattut siunnersuut.

(Inatsisartunut ilaasortaq Jens Napaattoq, Naleraq)

Akissuteqaat

(Aalisarnermut Piniarnermillu Naalakkersuisoq)

Naalakkersuisut Inatsisartunut ilaasortaq Jens Napaattoq, Naleraq, inuussutissarsiutigalugu aalisartunut piniartunullu inuussutissarsiutigalugu umiatsiaararsinissamat tapiiffigitittalernissaat siunertaralugu, Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut inatsisaata allannguutissaanik Naalakkersuisut siunnersuuteqarnissaannut peqquneqarnissaat Inatsisartut aalajangiiffigisassaattut siunnersuutaanut qutsavigaat.

Siullermik erseqqissassavara aalisarnermik piniarnermillu inuussutissarsiutit siuarnissaat pillugu Inatsisartut inatsisaat suli atuummat. Taamaattorli 2020/2021-mi COVID-imik misissuinermut atatillugu aningaasanut inatsimmi konto 51.07.42-mi attartortitassanut ernialinnut aningaasaliineq sipaarniutigineqarpoq. Tamatumalu kingorna kontomut pingaarnermut aningaasaliisoqarsimanngilaq. Aqutsisoqarfimmili ilisimaneqarpoq tapiiffigineqarnissaq soqutigineqarnerusoq taarsigassarsianik akilersorneqartussanik attartornerminngaanniit.

Angallatinut umiatsiaaqqanullu taarsigassarsianut tapiissutinullu tunngatillugu ataatsimut isigalugu ESU-mut ukiuni kingullerni qinnuteqaatit ikiliartorsimapput.. Ilimagineqarpoq tamatumunnga pissutaasoq ilaat tassaasoq sunut aningaasaliinissamik aalajanginnginnermi aalisarneq pillugu inatsisip nutaap inerneru utaqqimaarneqarsimasoq. Aammali sinerissap qanittuani aalisarnermi tunisat nalingi, tassa sinerissap qanittuani aalisartunut akiliutit tamarmisut, qaffakkiartornikuupput, taamaalilluni sinerissap qanittuani aalisartunut ukiuni qulini kingullerni katillugit 491 mio. kr-nik imaluunniit 66 %-imik qaffannikuupput, 2014-imi 748 mio. kr-niiniit 2023-mi 1.239 mio. kr-nut. Qaffaat tunisat annertusinerannut akiligassiissutillu qaffannerannik pissuteqartinneqassaaq. Malugineqarpoq naliliunneqarsimasut bonusinik, assartuinermut tapit il. il. ilanngunneqarsimanngitsut. Naatsorsuutigineqartariaqarpoq pisortanit taarsigassarsinissamat tapiiffigineqarnissamullu pisariaqartitsineq sumiiffiit ilaanni annikillisimasoq.

Aalisarneq pillugu inatsimmi nutaami peqatigitillugu Pisassiissutit Niuerutigineqarsinnaasut Nammineq pigisat PNNP, saattuarniarnermut aamma aqutsiveqarfimmi 47-mi umiatsiaaqqanut nammineq piumasutsimik atorineqarsinnaasut atuutilersinneqassapput. Aalisartut PNNP-mut nammineq ikaarsarninartut ikaarsaariarneranni pisassiissutinik piginneqataassutsinik tunineqassapput aalisarnerminni ineriartortitseqqinnissamat qularnaveeqqutitut atorsinnaasaannik

Pissutaasinnaasoq alla aamma tassaasinnaavoq, aalisartut aningaaserivimmi imaluunniit ingerlatsiveqarfinni aningaasanik taarsigassarsisarsimanerat. Naalakkersuisut aalisarneq pillugu inatsisip nutaap akuerineqarneranut atillugu aningaaseriviit oqaloqatiginikuuat, aningaaseriviillu

oqaatigaat aalisarnermut aningaaliinissaq soqutigalugu – aamma sinerissap qanittuani aalisarnermi. Aningaaserivimmi attartussagaanni inuit ataasiakkaarlugit akiliisinnaassusiat nalilersorneqartarpoq.

Tamanna tunuliaqutaralugu Naalakkersuisuit isumaqarput taarsigassarsiat erniallit inuussutissarsiutigalugu umiatsiaararsortunut atuutilersinneqarnissaat sinerissamut qanittuani aalisarnermi pisariaqartitsinermit ilaangitsoq. Aalisartut imminut akilersinnaasumik aalisartut imaluunniit PNNP atorlugu aalisartut angallatimik atortumillu ineriartortinnissaanut nutarsarnissaannullu aningaasanik taarsigassarsinissamut periarfissaqareerput.

Sulili aalisartoqarpoq aningaasanik pisariaqartunik taarsigassarsinissamut periarfissaqanngitsunik. Taakkunungalu taarsigassanik utertitassanik attartornermiit tapiissutit allatut iliuusissaasoq pitsaanerusorlu Naalakkersuisuit isumaqarput.

Peqatigitillugu tapiissuteqartarnermi allaffissornermi isumalluutit ikinnerusunut pisariaqarput taarsigassarsianik utertitassanik suliaqarnermit. Inuussutissarsiutinik siuarsaanermut taarsigassarsianik ineriartortitsineq atornagu allaffissornermi isumalluutit ullumikkut annertutigisut pigiinnarneqarsinnaapput. Peqatigitillugu aningaasaliissutit ullumikkut tapiissutit tunniunneqartartut atugassanngortinnissaat isiginiarneqarsinnaavoq, taamaalilluni taarsigassarsianut aningaasaliissutinik nutaanik nassaarniarsarinermit inuussutissarsiummi pisariaqartit iliuuseqarfigineqarsinnaapput. Taamaasilluni isumalluutinik atuineq aalisartunut pitsaanerpaamik kinguneqassaaq.

Aalisarnej pillugu inatsit nutaaq aalisarnermut nutaanik sinaakkusiivoq aammalu angallatinut nutaanut aalisarluarsinnaanerusunullu atortunullu nutaanut aningaasaliinissamik pisariaqartitsineq annertunerulissalluni. Naalakkersuisunut pisariaqartitsineq taanna malinnaavigissallugu aammalu aalisartut pitsanngorsaaniissamut taarsigassarsinissaannut periarfissaqanngitsut malinnaaviginissaat pingaaruteqarpoq. Taamaammat Naalakkersuisuit ESU-mi ineriartornermik misissuineq aallartinnikuuaat, tassunga ilanngullugit aningaasaliissutit, qinnuteqaatit amerlassusaat, agguaassisarnerit. il.il.

Misissuineq una aalisarnermi piniarnermilu inuussutissarsiutinik siuarsaanermi tapiissutit pillugit inatsisissami nutarterinermit tunngaviliisuunissaa Naalakkersuisuit anguniagaraat, taamaalillunilu ullumikkut siunissamilu sinerissap qanittuani aalisarnermi tapiissutinik pisariaqartitanik tunniussisinnaaneq akuerineqarsinnaanngorniassammat. Misissuinermit qanoq inerniliisoqassanersoq nutarterinissamillu pisariaqartitsineq qanoq annertutiginersoq apeqqutaallutik, Naalakkersuisuit siunnersuutip nutaap Inatsisartunut qaqugu saqqummiunneqassanersoq nalilersorsinnaavaat, siunertaavorli kingusinnerpaamik UPA 2026-mi saqqummiunneqassasoq.

Aamma oqaatigissavara inuussutissarsiorlutik aalisartut, inuussutissarsiutigalugu piniartut aamma inuussutissarsiutigalugu nunalerisut taarsigassarsillutik aningaasalersuinissaannik periarfissiisumik aningaasaateqarfimmik pilersitsinissamik periarfissat isumaliutigeqqullugit Aalisarnermut, Piniarnermut Nunalerinermullu Ataatsimiititaliap Naalakkersuisuit suliame allami kaammattornikuugaat.

Naalakkersuisuit taamaalillutik immikkoortumi inatsisissamik piareersaaneq aallartereermassuk Naalakkersuisuit sinnerlugit allannguutissat siunnersuut una siunnersuutigaa:

”Aalisartunut piniartunullu taarsigassarsisitsisarneq aamma/imaluunniit tapersiisarneq pillugu ataatsimut inatsimmik Naalakkersuisut siunnersuuteqarnissaannut, tassungalu ilanngullugu aningaasaateqarfimmik pilersitsinissamik periarfissanik misissuinissaannik peqquneqarnissaat pillugu Inatsisartut aalajangiiffigisassaattut siunnersuut.”